

# TIAKU Nymerohpyry sero Tiago Ekarotopo

Sero pape tymerose Tiaku a Jezu enetupuhnanõ neneryme emero pata tõ po. Toto zurũko mana zae ehtoh poko Jezu poetoryme ahtao. Oturũko mana tytineruke pyra ehtoh poko te, tytineruke ehtoh poko roropa, kukuhtohkõ poko te, zae pyra imehnõ ekarory poko, omi etary poko, zae ehtoh riry poko roropa, imehnõ kerekeremary poko, epyrypara imehnõ motye toehtoh poko, penekhepyra ehtoh poko, oturutoh poko Ritonõpo a, enetuputyry poko roropa. Amorepaneme kynexine ynororo Jerusarẽ po, Jezu akorõme kynexine.

Tynymerohpyry ae ynara ekarõko mana: Ritonõpo enetuputyryhtao kyya xine, yrome kure imehnõ onyripyra kuahtao xine, toiparo rokẽ Ritonõpo enetupuhnõko sytatose.

## **Sero pape ao**

Osekarotopo *1.1*

Enetupuhtopo te, tuaro ehtopo *1.2-8*

Tytineruke pyra te, tytineruke *1.9-11*

Kukuhtohkõ poko *1.12-18*

Omi etary te, zae ehtoh tyriry *1.19-27*

Imehnõ riry oxisamo emero *2.1-13*

Enetupuhtopo, zae ehtoh riry *2.14-26*

Zae kuomirykõ ripory *3.1-18*

Jezu se pyra exiketõ epeme *4.1–5.1-6*

Tuaro ehtoh etyhporyme *5.7-20*

1 Ywy ase Tiaku. Ritonõpo poetoryme ase. Kuesêkõ, Jezu Kyrixtu poetoryme roropa ase. Ynymerohpyry moro onenerykõme. Juteu tõ matose. Jezu poetoryme roropa matose. Sapararahme exiketõme matose. Imehnõ patao exiketõme roropa matose. “Kure pãna matou repe?” kary se ase oya xine.

*Poremãpyra Jezu enetuputyry poko*

2 Wekyry tomo, atãkyematoko oetuarimarykohtao.

3 Mame oetuarimarykohtao poremãpyra awahtao xine Jezu enetuputyry poko orẽpyra exiko matose.

4 Morara exiryke eanahtotoko ekurehpyra oehtohkõme, kure rokẽ oehtohkõme Ritonõpo a, iirypyryme pyra oehtohkõme roropa eya: “Toiro ise ro mase kure oehtohme nymyry ya,” kara Ritonõpo ehtohme kyya xine.

5 Tuaro oexirykõ se awahtao xine, Ritonõpo omipona oehtohkõ poko ekaropotoko Ritonõpo a. Mame otuarõtanohtoryko mana, ekaroporyhtao oya xine, kutuarõtanohtohnekõme aexiryke. Kynekaropohpyrykõ motyêkãko roropa mana.

6 Yrome ekaroporyhtao Ritonõpo a, ijamitunuru enetupuhtoko. “Tuaro jehtoh ekarõko ma otarame Ritonõpo, nary rokene,” kara ehtoko. “Nary rokene,” karyhtao Ritonõpo poko, oty sã matou? Pohkane sã matose, tyryrykane a pohkane aroarory samo. Moro sã matose: “Nary rokene,” karyhtao oya xine.

7-8 Morara kananõ mã: “Zuaro pyra ase,” ãko toto, Ritonõpo omipona se pyra toexirykõke. Imehnõ omiry etaryhtao tyya xine, ityoromãko

toto. Mokaro sã awahtao xine Kuesëkõ ãkorehmara xine mana ekurehnõko.

*Tymõkomoke pyra exiry, tymõkomoke exiry, enara*

<sup>9</sup> Tymõkomoke pyra awahtao xine tãkye ehtoko. Ritonõpo nekarohpyry poko tãkye ehtoko roropa. Imeĩpo imehxo oritorỹko Ritonõpo mana ipoenõme oexirykõke.

<sup>10</sup> Tymõkomokamo, atãkyematoko roropa tymõkomoke pyra tyripose Ritonõpo a awahtao xine. Ona ekuru ohpapyry sã tymõkomoke exiketõ orihnõko mana.

<sup>11</sup> Xixi jetũ toehse ahtao, otyro anorỹko onahpoty roropa anorỹko, ekuru ohpahnõko mana. Axĩ ona ekurũpyry ixihpyryme exĩko ropa. Moro saaro tymõkomoke exiketõ orihnõko mana, toto eroku-ruhtao ro.

*Sero nase kukuhtohkõ poko*

<sup>12</sup> Kuetuarimarykohtao poremãpyra sehtone, tãkye rokẽ sehtone. Mame kukuhtopõpyrykõ tõtyhkase ahtao, jũme orihpỹme kyritorỹko Ritonõpo mana, kuepehpyrykõme, poremãpyra toehse kuexirykõke. Kuesëkõ maro exĩko sytatose, emero ise exiketõ maro. Morara tykase Ritonõpo exiryke tuaro sytatose.

<sup>13</sup> Oorypyrykomo a toporyse ropa awahtao xine: “Jukuhnõko mã Ritonõpo iiryppyryme jehtohme,” kara ehtoko. Ritonõpo imehnõ onukuhsaromepyra mana iiryppyryme aehtohme. Iiryppyryme imehnõ onyrippyry roropa Ritonõpo mana, iiryppyryme toto ehtohme.

<sup>14</sup> ãmoreme xine iiryppyryme exĩko matose, oorypyrykõ poko openetarykõke.

15 Oorypyrykō poko openetarykohtao ipoko exīko matose. Morarame rokē exīko matose oorypyrykō pokōme rokene. Mame oorypyrykō poko rokē oexirykōke orihnōko matose. Ritonōpo maro pyra matose exīko.

16 Jakorō tomo, osenekunohpyra ehtoko.

17 Emero kurākō Ritonōpo nekarohpyryme mana. Kure nymyry inekarohpyry kyaa xine. Kapu ezuru Rihpō mokyro. Inyrytā tyoro exīko mana. Yrome etyorōmara mana. Kokoro rokē kurākō ekarōko mā kyaa xine.

18 Tōsenetupuhtopōpyry ae ro tytyromapose sytatose eya typoenōme, aomiry kurā enetuputyryke kyaa xine, imehxo kuehtohkōme, emero tynyrytā esēme kuehtohkōme. Ajohpe pyra aomiry mana.

### *Aomiry etāko sytatose, otato sehtone*

19 Morara exiryke jakorō tomo, otato sehtone. Opyno xine ase. Axi hkopyra imehnō sezuhtone, axī pyra roropa syekītatone. Moro waro matose.

20 Kuatakirimarykohtao Ritonōpo omipona pyra exīko sytatose. Zae Ritonōpo mana. Aosenetuputyry roropa zae mana. Yrome kymarokō zae pyra sytatose tohne kuahtao xine. Naeroro atakirimara sehtone.

21 Morara exiryke oorypyrykō irumekatoko, ajoajohpe oexirykō irumekatoko. Ynara kahtoko okurohtao xine: “Popyra ase yrome yyrypyry rumekary se ase. Ritonōpo omipona se ase,” kah-toko okurohtao xine. Mame okurākatorỹko ropa mana aomiry tonetupuhse oya xine ahtao.

22 Ritonõpo omiry omipona ehtoko. Aomiry etaryhtao oya xine, otato ehtoko. Ynara karyhtao oya xine: “Ritonõpo poetoryme ase, aomiry etaryke ya,” karyhtao oya xine, osenekunohnõko rokē matose. Morara exiryke aomipona roropa ehtoko.

23 Ritonõpo omiry etãko matose. Mame aomipona pyra awahtao xine, osene ae oseneketõ sã matose. Ynara exiryke, tõmytykõ osene ae enẽko toh repe.

24 Yrome tõsenekexĩpo xine axĩ tõmytykõ enetopõpyry poko wenikehnõko ropa mã toto. Mokaro sã mã otato pyra exiketomo. Ritonõpo omiry etaxĩpo axĩ wenikehnõko mã toto, tynysekeremahpyrykõ poko.

25 Yrome Ritonõpo omiry kurã poko yronymyryme âtamoreparykohtao, aomipona exĩko matose. Aomipona awahtao xine orẽpyra exĩko matose, oorypyrykõ poko pyra exĩko matose. Wenikehpyra roropa matose âtamorepatopõpyrykõ poko. Aomipona rokē ipunaka exĩko matose. Morara awahtao xine Ritonõpo kure oritorỹko mana.

26 Omi rypyry onurumekara kuahtao xine toiparo rokē, Ritonõpo enetupuhnõko ase jesẽme, ãko sytatose. Omi xihpyry onurumekara kuahtao xine osenekunohnõko sytatose.

27 Ynara rokē kure mana Kumykomo a, Ritonõpo a: poetõpo tõ pyno kuahtao xine, pytỹpo tõ etuarimaketõ pyno kuahtao xine, kyyrypyrykõ poko pyra kuahtao xine; morara kuahtao xine, kure sytatose Ritonõpo a.

## 2

### *Oxisā imehnō tyritoko, kure rokene*

<sup>1-3</sup> Wekyry tomo, Jezu Kyrixtu Kuesēkō kurā enetupuhnanōme oexirykōke oximōnōko matose Ritonōpo omiry poko. Mame tymōkomoke exikety toehse ahtao, tomahtaōke uuru risē ke te, tynamuruke kurā ke roropa; mokyro porohkapōko matose epehtoh kurā pona. Ime mokyro enetupuhnōko matose. Mame imehnō roropa oehnōko tymōkomokākara; otara āko matou? “Xikihme rokē ehtoko,” āko matose eya xine. Otarāme nono pona rokē toto porohkapōko matose, toto onyporohkapopyra kurā pona matose. Zae pyra matose morara awahtao xine. Imehnō oxisā tyritoko kure rokene.

<sup>4</sup> Imehnō zupō eneryke toto apiakaryhtao oya xine, popyra matose Ritonōpo a.

<sup>5</sup> Jakorō tomo, otato ehtoko. Opoko xine jenupunaryke ynara āko ase oya xine, tymōkomokākara tymenekase Ritonōpo a tonetupuhtohme yronomyryme. Morara toto riryke tymōkomokā sā exīko toh mana. Toto poko ynara tykase Ritonōpo: “Yse exiketō rīko ase tuisame Umūkuru maro,” tykase.

<sup>6</sup> Yrome tymōkomokākara kure onyripyra matose. Oty katohme? Tymōkomoke exiketō mā otuarimanohpotorỹko mana. Aarotorỹko roropa mā toto terekatu ēpataka.

<sup>7</sup> Kure kuhse Jezu mana. Ipoetoryme kuekarotorỹko roropa imehnō mana. Yrome mokaro Jezu poetory kerekeremāko mā toto.

<sup>8</sup> Pake ynara tykase Ritonõpo tosëkõme tone-tupuhnanomo a: “Imehnõ pyno ehtoko osepyno oehtohkõ samo,” tykase. Morara tymerose Ritonõpo omiryne. Moro omipona awahtao xine kure kuhse matose.

<sup>9</sup> Yrome imehnõ zupõ eneryke oya xine: “Popyra mokyro,” äko matose. Oty katohme? Morara awahtao xine popyra matose ipunaka Ritonõpo a. Iirypyryne ro matose Ritonõpo mã awãnohtorÿko mana tõmipona pyra oexirykõke.

<sup>10</sup> Ritonõpo omipona exisasaka awahtao xine popyra ro matose. Toiro aomipona pyra awahtao xine iirypyryne ro matose ipunaka.

<sup>11</sup> Ynara tykase Ritonõpo: “Imehnõ nohpo poko pyra ehtoko. Imehnõ orutua kõ poko pyra roropa ehtoko,” tykase Ritonõpo. Ynara tykase roropa ynororo: “Imepÿ onetapara ehtoko,” tykase. Morara exiryke imehnõ nohpo poko pyra awahtao xine, yrome imepÿ etaparyhtao roropa, iirypyryne ro matose. Ritonõpo omipona pyra.

<sup>12</sup> Morara exiryke zae rokë ehtoko õtururukõ poko, otytyko poko roropa, enara, tuaro oexirykõke. Aomipona pyra awahtao xine awãnohtorÿko mana, tõmipona pyra tokurehse oexirykõke. Aomipona awahtao xine orëpyra exïko matose, oorypyrykõ poko pyra exïko matose.

<sup>13</sup> Imehnõ poko enupunara awahtao xine opoko xine enupunara roropa Ritonõpo exïko mana. Yrome imehnõ poko oenupunarykohtao orëpyra exïko matose. Opoko xine enupunãko roropa Ritonõpo mana. Awãnohpopyra xine mana.

*Jezu enetuputyryke kyya xine aomipona sehtone*

14 Wekyry tomo, ynara karyhtao imepyny a oya xine: “Ritonõpo enetupuhnõko ase,” karyhtao, yrome imehnõ kure onyripyra ynororo ahtao, ajohpe rokē mana. Ritonõpo poetoryme exipyra ekurehnõko mana. Ekurākapopyra mana Ritonõpo a.

15 Imepỹ Jezu poetory etuarimary eneryhtao oya xine tupoke pyra, tohke pyra roropa.

16 Mame ynara karyhtao eya: “Torētyke pyra ytoko. Oxiõtota. Otuhko,” āko matose repe. Yrome tōsē onekaropyra, upo roropa onekaropyra. Otāto ke etuarimara exīko nae? Etuarimāko ro.

17 Morararo Ritonõpo enetuputyryhtao kyaa xine, imehnõ rīko kure sytatose. Kure imehnõ onyripyra kuahtao xine, ajohpe rokē, enetupuhnõko ase, āko sytatose.

18 Imepỹ ynara āko kyaa xine mā repe: “Ene-tupuhnõko matose. Ywy kure imehnõ rīko ase,” āko mā kyaa xine. Mokyro a ynara āko ase: “Otāto imehnõ riryhtao kure onenetupuhpyra hma ro-rohpa? Popyra imehnõ riry oya eneryke tyaa xine Jezu poetoryme pyra oekarõko mā toto. Yrome kure imehnõ riry ya eneryke tyaa xine, ipoetoryme jenetupuhnõko mā toto,” āko ase eya.

19 Toiro Ritonõpo mana. Moro enetuputyryke oya xine Ritonõpo poetoryme osekarõko matose repe. Yrome joroko tō roropa moro enetupuhnõko Ritonõpo kure exiry poko. Oserehnõko mā toto, ekurākara tokurehse toexirykõke.

20 Tuaro pyra ro hmatou? “Ritonõpo enetupuhnõko ase,” karyhtao, yrome imehnõ onyripyra kure awahtao xine toiparo rokē: “Ritonõpo enetupuhnõko ase,” āko matose, tuaro



pyra oexirykōke.

<sup>21</sup> Kytamurukō Aparão poko ourutorỹko ase turo oehtohkōme. Iirypyry tykorokase Ritonōpo a, otato aexiryke. Tumūkuru tarose eya etapatohme repe tynekaroryme Ritonōpo a, aomipona toehtohme.

<sup>22</sup> Menetupuhtou? Ritonōpo omipona Aparão toehse. Tosēme Ritonōpo tonetupuhse eya. Morara exiryke, aomipona toehse Aparão, tonetupuhse eya ipunaka. “Toiro ise ro ase kure oehtohme,” kara Ritonōpo eya.

<sup>23</sup> Zae Ritonōpo omihpyry, ynara katopōpyry: “Ritonōpo tonetupuhse Aparão a. Morara exiryke Ritonōpo enetuputyryke eya kurāme tonese eya,” tykase. Mame: “Jepeme Aparão mana,” tykase roropa Ritonōpo ipoko.

<sup>24</sup> Menetupuhtou? Kukurākatorỹko Ritonōpo mana, tōmipona kuahtao xine, enetuputyryhtao kyaa xine roropa.

<sup>25</sup> Morararo Raape kynexine. Mokyro orutua kō poko exikety kynexine. Yrome Ritonōpo enetuputyryke tyaa, Jozue poetory tō towomase eya tytapyĩ tao. Mame taropose ropa toto eya tyoro os-ema ae, onetapara toto ehtohme. Morara exiryke kure mokyro tyrise ropa Ritonōpo a tōmipona toehse exiryke.

<sup>26</sup> Tokoke sytatose repe, yrome tuzenuke pyra kuahtao xine orihnōko sytatose. Oty katohme pyra kuokokō mana, tuzenuke pyra ahtao. Moro saaro Ritonōpo enetuputyryhtao kyaa xine, yrome kure imehnō onyripyra kuahtao xine. Toiparo rokē: “Ritonōpo enetupuhnōko ase,” āko sytatose. Osenekunohnōko rokē sytatose.

### 3

#### *Kuomirykō poko*

<sup>1</sup> Jakorō tomo, Jezu poetory tō amorepananō iirypyryme toehse ahtao, toto wānohnōkohxo Ritonōpo mana. Naeroro tuhke pyra Jezu poetory amorepananōme ehtoko.

<sup>2</sup> Kymarokō emero azahkuru sytatose. Toitoine rokē pyra. Kuomirykō xihpyry poko kuahtao xine iirypyryme exīko roropa sytatose. Kuomirykō poko iirypyryme pyra kuahtao xine, kure rokē sytatose. Orēpyra sytatose exīko. Kyyrypyrykō poko pyra roropa sytatose exīko.

<sup>3</sup> Kawaru mytaka kurimene pitiko rīko ahno, tōmipona xine kawaru ehtohme. Moro kurimene pitiko rokē repe. Yrome ike kawaru panahmāko mā toto, tōmipona xine toto ytotohme.

<sup>4</sup> Morararo wapu konōto. Mame tyryrykane konōto wapu arōko, yrome āpuitoh pitiko ke wapu āpuine āpuīko mana, tōmipona wapu ytotohme.

<sup>5</sup> Morohne sā kunurukō mana, pitiko rokē repe. Yrome epoe tuhke kuomirykō tūtāko mana, tuhke roropa kuepyrypatohkō tūtāko mana. Osenetupuhtoko ke apoto pitiko repe yrome emānōko mana. Itu zahkāko mana, wewe tō zahkāko roropa mana.

<sup>6</sup> Moro saaro kunurukō apoto sā mana. Kunurukō poe omi rypyry itamurume tūtāko mana. Mame omi xihpyry tūtaryhtao kunurukō poe popyra kuosenetupuhtohkō exīko mana. Poetome kuahtao xine omi rypyry tūtāpitōko mana kunurukō poe. Zumo toehse kuahtao xine omi rypyry tūtākohxo mana, apoto konōto ehtoh sā joroko tamuru poe kyzahkase xine.

<sup>7</sup> Onokyro tō kuremary waro sytatose zehno pyra toto ehtohme. Itu htaō komo nakuaōkō ro-ropa. Torēnanohse toto ahno a zehno pyra toto ehtohme.

<sup>8</sup> Yrome kunurukō onukuremasaromepyra sytatose kure ehtohme. Kunurukō okoi sā mana, popyra.

<sup>9</sup> “Kure mase Papa, yna Esēme mase,” āko sytatose repe. Yrome kunurukō ke ro imehnō kerekeremāko sytatose. Tysaaro tyrise kymarokō Ritonōpo a.

<sup>10-12</sup> Tuna enatyry wino tuna kurā maro tuna itunety oehpyra mana; tuna inehsāme exikety wino tuna kurā oehpyra mana. Morararo wikeira toperyme rokē eperytāko mana; tyorōme eperytara mana. Uwa zoko fikume eperytara mana. Kýtarykō toiro repe. Yrome toiro myta poe asakoro tūtāko mana: omi kurano, omi rypyry, enara. Jakorō tomo, morara ahtao popyra mana!

*Ritonōpo poe tuaro kuahtao xine*

<sup>13</sup> Metatou? Menetupuhtou? Tonetupuhse oya xine ahtao, kure imehnō tyritoko. Imehnō motye se pyra ehtoko roropa. Morara awahtao xine imehnō ynara āko opoko xine: “Tuaro mose nase,” āko toto opoko xine.

<sup>14</sup> Yrome imehnō zumoxike awahtao xine, imehnō kure riry poko typenekehse awahtao xine, osepyno rokē awahtao xine roropa, popyra matose ipunaka. “Kure ase, imehnō sā pyra,” kara ehtoko. Morara karyhtao oya xine ajohpe rokē matose, iirypyryme ro oexirykōke.

<sup>15</sup> Moro tuaro ehtoh Ritonōpo poe pyra mana. Sero pōkō poe rokē morara tuaro ehtoh mana.

Morara awahtao xine, Ritonõpo Zuzenu poe pyra tuaro matose. Joroko poe osenetupuhnõko rokẽ matose.

<sup>16</sup> Imehnõ zumoxike awahtao xine te, tuisamehxo oexirykõ se awahtao xine roropa, ajoajohpe itamurume exiõko matose iirypyryme ipunaka.

<sup>17</sup> Yrome Ritonõpo poe tuaro kuahtao xine osemazuhme kyyrypyrykõ se pyra exiõko sytatose. Morara kuahtao xine imehnõ poko enupunãko sytatose. Tomeseke roropa exiõko sytatose imehnõ maro, zae rokẽ toto ezuhnõko sytatose. Imehnõ pyno sytatose, imehnõ onyxhiropyra roropa sytatose. Kure rokẽ imehnõ riõko sytatose roropa, osetyoro imehnõ onyripyra sytatose. Onekunohtõkõ sã pyra roropa sytatose.

<sup>18</sup> Tupito pona otyro puhturu tarykase ahtao kyya xine, otyrome ro emãnõko mana. Moro saaro oxiehno pyra exiketõ imehnõ amoreparyhtao, tuhkãkõ oxiehno pyra exiõko mana.

## 4

### *Iirypyrymãkõ penetatoh poko awahtao xine*

<sup>1</sup> Oty pokoino oseosezuhnõko matou? Oty katoh epokõnohnõko roropa matohu? Openetatohkõ pokoino oxiehno matose. ãmoreme xine roropa oxiehno matose.

<sup>2</sup> Mõkomo poko penetãko matose repe, yrome anapoipyra matose. Morara exiryke imehnõ etapary se exiõko matose, anapoipyra oekuretyrykõke. Imehnõ mõkomory se matose repe. Yrome anapoipyra matose ekurehnõko. Morara exiryke ehtomãko matose. Oseosezuhnõko rokẽ matose. Openetatohkõ

anapoipyra matose ekurehnōko, Ritonōpo a onekaropopyra oexirykōke.

<sup>3</sup> Mame Ritonōpo a ekaroporyhtao oya xine anapoipyra ro matose, Ritonōpo omipona se pyra oexirykōke, openetatohkō se rokē oexirykōke. Morara awahtao xine azahkuru matose.

<sup>4</sup> Imehnō poko exikety sã matose, Ritonōpo kuroko oorypyrykō poko oexirykōke. Tuarō pyra hmatohu? Ritonōpo se pyra exiketō epeme awahtao xine, Ritonōpo epeme pyra matose. Morara exiryke iirypyrymākō penetatoh poko awahtao xine Ritonōpo epeme pyra exīko matose.

<sup>5</sup> Ynara āko Ritonōpo omiry kyaa xine: “Ritonōpo nyrihpyryme sytatose. Yrome orēpyra kypenetatohkō poko sytatose,” āko mā kyaa xine Ritonōpo omiry. “Ajojhe,” kara ehtoko moro poko.

<sup>6</sup> Yrome Tuzenu ke kyjamihtanohtorŷko Ritonōpo mana kyyrypyrykō poko penetara kuehtohkōme. Ynara tymerose sero poko Ritonōpo omiry: “Imehnō motye se exiketō akorekehkāko Ritonōpo mana, yrome imehnō motye se pyra exiketō rokē poko enupunāko Ritonōpo mana,” āko mā Ritonōpo omiry kyaa xine.

<sup>7</sup> Morara exiryke osekartoko Ritonōpo a: “Ose ase jesēme,” kahtoko eya, yrome joroko tamuru a ynara kahtoko: “Jesē kara mase. Morara exiryke ytoko taroino,” kahtoko eya. Morara kary etaryke tyaa epāko joroko tamuru mana.

<sup>8</sup> Ritonōpo maro se oexirykō se awahtao xine, amaro xine se roropa ynororo mana. Iirypyrymākomo, oorypyrykō irumekatoko, oorypyrykō ikorokapotoko Ritonōpo a.

9 Itamurume iirypyryme matose. Morara exiryke oxitatoko yronymyryme. Oorypyrykõ poko tãkye oehtohkõ irumekatoko Ritonõpo neneryme.

10 “Papa, ywy ase popyra rokene, õmipona exis-  
aromepyra ase,” karyhtao kyya xine Ritonõpo a,  
tyrisenã sã kyritoryko Ritonõpo mana, kueanokõ  
jamihtanohnõko roropa mana. Kuakorehma-  
toryko roropa mana, tõmipona kuehtohkõme.

*Imehnõ popyra onekaropyra ehtoko*

11 Jakorõ tomo, oxikerekeremara ehtoko. Ynara  
ãko Moeze nymerohpyry: “Imehnõ pyno ehtoko,”  
ãko mã kyya xine. Mame imehnõ kerekere-  
maryhtao oya xine, popyra Moeze nymeroh-  
pyry ekarõko matose, aomipona pyra oexirykõke.  
“Moeze nymerohpyry popyra,” kananõme rokẽ  
exiko matose.

12 Ritonõpo a tõmiry tymeropose tõmipona  
kuehtohkõme. Ynoro rokẽ kukurãkarykõ waro  
mana. Ynoro rokẽ kuenahkaporykõ waro roropa  
mana. Naeroro: “Mose xihpyryme mana Ritonõpo  
a,” kara ehtoko imehnõ poko. Ritonõpo rokẽ  
iirypyryme exiketõ waro mana, iirypyryme pyra  
exiketõ waro roropa mana. Naeroro imehnõ  
popyra onekaropyra ehtoko.

*“Epyrypara sehtone,” katoh poko*

13 Etatoko pahne, ynara ãko matose otarame  
opoe xine rokene: “Ytõko ynanase, mõtohne os-  
epakahse. Toiro jeimamyry aropõko ynanase yna  
osepekatyry poko rokene, tineru apoitohme ita-  
murume,” ãko matose. Morara kara ehtoko.

14 Ynara exiryke, yrokokoro otara tyko kuehtohkō onenetupuhpyra sytatose. Kuorikyrykō onenetupuhpyra roropa sytatose. Akurū sā sytatose. Pakeimo ke akurū mana. Mame okynā pixo toehse ahtao akurū osenepyra exīko mana. Moro sā rokē sytatose, akurū samo, axītao rokene.

15 Ynara rokē kahtoko: “Jorikyry se pyra Ritonōpo ahtao rokē orihpopyra ase, ytoytōko mōtohne. Otyro poko erohnōko ase, ise Ritonōpo ahtao rokene,” kahtoko.

16 Māpyra: “Ime ase. Jamoreme rokē ase otyro poko, Ritonōpo poe pyra,” karyhtao oya xine, āmoreme xine rokē epyrypāko matose. Morara kary popyra mā ipunaka.

17 Kure imehnō riry waro awahtao xine, yrome kure toto onyripyra oekuretyrykohtao iiryppyryme matose Ritonōpo a.

## 5

### *“Tomeseke ehtoko.”*

1 Etatoko pahne, itamurume tymōkomoke exike-tomo. Seromaroro tymōkomoke matose. Yrome tymōkomoke pyra exīko ropa matose. Etuarimāko rokē matose. Naeroro oxitatoko, oetuarimarykō oepyry poko.

2 Omōkomorykō mā tymotase mana. Oupōkō kurā ouponỹpyrykōme toehse mana, nuko panō a tonahse exiryke.

3 Otinerūkō ahkyryxitāko mana ryhtāko. Moro eneryke tyya xine ynara āko imehnō mana opoko xine: “To, osepyno rokē moxiā nah, omomyke rukuh ipunaka toh nae,” āko toh mana opoko xine.

Mame apoto nyahkahpyry sã sam ãko matose oetuarimarykohtao. Seromaroro mõkomo tapoise oya xine ãpiakasasaka awahtao xine.

<sup>4</sup> Yrome opoetorykõ mã okerekerematorỹko, zae toerohtopõpyrykõ onepehmara oexirykõke. Otupikõ poko erohketõ xitary etãko Ritonõpo Jamihmehxo Exikety mana, zae pyra topehmase toto exiryke oya xine.

<sup>5</sup> Openetarykõ poko rokẽ tytamuhpopãse matose, ãtãkyemarykõ poko roropa oorypyrykõ poko. Okyno nahpãko ahno tupune toto ehtohme toto etapatohme tõsẽme. Mokaro sã matose, tymõkomoke toehse oexirykõke. Taroino etuarimãko matose apotoimo htao.

<sup>6</sup> Kurãkõ mekarootose popyra. Metapapoatose toto roropa osewomara toto ahtao.

### *Sẽ nase penekhepyra kuehtohkõ poko*

<sup>7</sup> Jakorõ tomo, penekhepyra ehtoko Kuesẽkõ eraximary poko. Aepyry ropa momohnõko matose. Tupito esã mã penekhepyra tỹkyryry epery eraximary poko. Konopo oepyry eraximãko mã toto otyro õxihtato po. Imeĩpo tuãtasehxo otyro ahtao konopo oehnõko ropa mana. Konopo oepyry eraximary poko penekhepyra roropa esã mana.

<sup>8</sup> Mokaro saaro penekhepyra ehtoko Kuesẽkõ oepyry ropa eraximary poko. Oeanokõ ijamih-tanohtoko, okynã pyra Jezu oehtoh ropa exiryke.

<sup>9</sup> Jakorõ tomo, ekerekeremara ehtoko. Imehnõ onykerekeremara roropa ehtoko, ohxiropyra xine Ritonõpo ehtohme. Etatoko pahne, kuapiakanekõ oehnõko mana, Imehxo Exikety.



Oehsasaka mana. Ynororo rokē mā iirypyrymākō hxirōko mana.

<sup>10</sup> Jakorō tomo, wenikehpyra ehtoko Ritonōpo poe pake urutō kō poko. Tutuarimarykō poko penekhepyra toto. Naeroro kutuarōtanohorŷko toh mana, tysā xine kuehtohkōme.

<sup>11</sup> Tākye rokē toh mana seromaroro, zae rokē Ritonōpo omipona toehse toexirykōke orihpyra ro tahtao xine. Toetuarimase toto itamurume Ritonōpo omipona toexirykōke. Yrome onurumekara toto. Morararo toehse Jo. Toetuarimaryhtao penekhepyra toehse ynororo, Ritonōpo a kure tyriporo ropa eraximary poko. Imeīpo kure Jo tyrise ropa Ritonōpo a tōseanahtose itamurume exiryke. Morara exiryke soseanahtotone ropa. Kypyno xine ipunaka Ritonōpo mana. Kuānopyrykō se pyra roropa mana.

<sup>12</sup> Jakorō tomo, ajoajohpe pyra ehtoko: “Ajoajohpe rokē moxiamo,” kara imehnō ehtohme opoko xine. “Ytōko ase ākorehmase,” tykase awahtao xine imehnomo a, ōmihpyrykō anamonohpyra ehtoko. Ytotoko. Ōmirykō onetapapopyra ehtoko. Morararo otyro poko ehtoko. Ekarory se pyra awahtao xine: “Ekarory se pyra ase,” kahtoko. Jūme rokē imehnō zurutoko. “Ajoajohpe mokaro,” kara Ritonōpo ehtohme opoko xine, awānohpyra xine aehtohme roropa.

<sup>13</sup> Oetuarimarykohtao, oturutoko Ritonōpo a. Sekese awahtao xine oeremiatoko Ritonōpo kure exiry poko.

<sup>14</sup> Kurākara nae ahtao roropa, Jezu poetory tō ikohmatoko, tamuximehxo exiketomo, toto oturutohme Ritonōpo a ikurākatohme ropa. Azeite ke

zuhshumatoko roropa Kuesēkō omi poe.

<sup>15</sup> Mame toto oturutopōpyry poe ekurākāko ropa kurākara mana, Jezu enetuputyryke mokaro a. Kuesēkō mā mokyro kurākāko ropa mana. Iirypyryme mokyro ahtao iirypyry korokāko roropā mana.

<sup>16</sup> Morara exiryke iirypyryme awahtao xine ekarotoko imehnō netaryme, oorypyrykō rumekatohme ropa oya xine, ikorokatohme roropa Ritonōpo a. Oturutoko Ritonōpo a imehnō pokō roropa okurākatohkōme ropa. Mame aomipona exiketō otururuhtao yronymyryme ōmirykō etāko Ritonōpo mana. Tyjमितunuru ekarōko oya xine mana tōmipona exiketōme oexirykōke.

<sup>17</sup> Eria kysā xine ahnome pake. Mame tōturuse ynororo yronymyryme Ritonōpo a. Ynara tykase ynororo: “Konopo onenehpopyra exiko,” tykase. Mame tonehpokehse Ritonōpo a. Oseruao jeimamyry zokonaka konopo oehpyra toehse.

<sup>18</sup> Morarame tōturuse ropa konopo oehtohme ropa. Mame konopo tonehpose ropa Ritonōpo a aomi poe. Ona tukurākase ropa. Otyro tōkehko tahtase ropa.

<sup>19</sup> Jakorō tomo, Ritonōpo omipona pyra aexihpyry ropa nae ahtao, mame mokyro akorehmaryhtao oya xine zae enetupuhtohme ropa eya, kure exīko ropa mana.

<sup>20</sup> Oya xine mokyro enepyry ropa ahtao tyrypyry rumekatohme ropa eya ikurākāko ropa Ritonōpo mana, apotoimo htaka ytopyra aehtohme. Iirypyry korokāko roropa Ritonōpo mana. Mame imehnō pokō enupunaketōme

nymyry matose exĩko, mokyro takorehmase oya  
xine exiryke. Enara.

[]  
**Khmer Standard Version of the Holy Bible in  
the Khmer Language of Cambodia**

Copyright © 1997, 2005 The Bible Society in Cambodia

[]

© រក្សាសិទ្ធិដោយសមាគមព្រះគម្ពីរសកល

គ្រប់ ផ្នែក នៃ សៀវភៅ នេះ មិន ត្រូវ បាន ផលិត ឬ ប្រើប្រាស់ តាម ទំរង់ ឬ មធ្យោបាយ បែប អេឡិចត្រូនិក ឬ ម៉ាស៊ីន ណាមួយ រួម ទាំង ការ ថត ចម្លង អាត់ សំលេង ផ្ទុក នូវ ទិន្នន័យ ប្រព័ន្ធ ណាមួយដែលអាចយកមកប្រើ ដោយគ្មានការអនុញ្ញាតពីសមាគមព្រះគម្ពីរកម្ពុជា។ ប្រសិនបើ មានការដកស្រង់អត្ថបទគម្ពីរចាប់ពី ១០០០ខ ឡើងទៅ ត្រូវសុំការអនុញ្ញាតពីសមាគមព្រះគម្ពីរ កម្ពុជា

Quotations of the Bible in Khmer Standard Version in any form, must obtain written permission from the Bible Society in Cambodia if the quoted material is inclusive of at least 1,000 verses, or a copy of any book wholly or partially, which amounts to 50% of the book quoted. For any long quotation, notice of copyright must appear as follows: Text copyright © 1997, 2005 United Bible Societies. Used by permission.

---

PDF generated using Haiola and XeLaTeX on 25 Apr 2025 from source files dated 26 Apr 2025  
fc9611d4-b5f2-5730-b6c2-58f2658eac89